

四庫全書

子部

欽定四庫全書

子部
石山醫案卷上

詳校官太醫院醫士臣趙正池

編修臣倉聖脈覆勘

總校官庶吉士臣何思鈞

校對官助教臣胡子襄

謄錄舉人臣吳之承

欽定四庫全書

子部五

石山醫案

醫家類

提要

臣等謹案石山醫案三卷明陳楠編楠祁門人學醫於同邑汪機因取機諸弟子所記機治療效驗裒為一集每卷之中畧分門類為次自宋金以來太平惠民和劑局方行於南河間原病式宣明論方行於北局方多溫燥

之藥河間主瀉火之說其流弊亦適相等元
朱震亨始矯局方之偏通河間之變而補陰
之說出焉機所作推求師意一書寔由戴元
履以溯震亨故其持論多主丹溪之法然王
氏明醫雜著株守丹溪主於過用苦寒機復
為論以辨之其文今附醫案之末則機亦因
証處方非拘泥一格者矣其隨試輒效固有
由也舊本又有機門人程鑄所作病用參耆

論一篇又有機所作其父行狀及李汎所作
機小傳今亦併錄之備參考焉乾隆四十三
年六月恭校上

總纂官

臣紀昀

臣陸錫熊

臣孫士毅

總校官

臣陸

費

墀

金定巴虎人二

提要

欽定四庫全書

石山醫案卷上

榮衛論

明 陳桷 撰

丹溪論陽有餘陰不足乃據理論人之稟賦也蓋天之
日為陽月為陰人稟日之陽為身之陽而日不虧稟月
之陰為身之陰而月常缺可見人身氣常有餘血常不
足矣故女人必須積養十四五年血方足而經行僅及

三十餘年血便衰而經斷陰之不足固可驗矣丹溪揭
出而特論之無非戒人保守陰氣不可妄耗損也以人
生天地間營營於物役役於事未免久行傷筋久立傷
骨久坐傷腎久視傷神久思傷意凡此數傷皆傷陰也
以難成易虧之陰而日犯此數傷欲其不夭札也難矣
此丹溪所以立論垂戒於後也非論治陰虛之病也若
遇有病氣虛則補氣血虛則補血未嘗專主陰虛而論
治且如產後的屬陰虛丹溪則曰右脉不足補氣藥多

於補血藥左脉不足補血藥多於補氣藥丹溪固不專
主於血矣何世人昧此多以陰常不足之說橫於胃中
凡百諸病一切主於陰虛而於甘溫助陽之藥一毫不
敢輕用豈理也哉雖然丹溪謂氣病補血雖不中亦無
害也血病補氣則血愈虛散是謂誅罰無過此指辛熱
燥烈之劑而言亦將以戒人用藥寧可失於不及不可
失於太過蓋血藥屬陰而柔氣藥屬陽而剛苟或認病
不真寧可藥用柔和不可過於剛烈也書曰罪疑惟輕

功疑惟重本草曰與其毒也寧善與其多也寧少之意
正相合也雖然血虛補氣固為有害氣虛補血亦不可
謂無害吾見陽虛氣弱不能運行血越上竅者多用四
物湯涼血之藥反致胸腹痞悶飲食少進上吐下瀉氣
喘嘔血去死不遠豈可謂無害耶是以醫者貴乎識病
真耳

或又曰人稟天之陽為身之陽則陽常有餘無待於
補何方書尚有補陽之說予曰陽有餘者指衛氣也

衛氣固無待於補而營之氣亦謂之陽此氣或虛或盈虛而不補則氣愈虛怯矣經曰怯者著而成病是也況人於日用之間不免勞則氣耗悲則氣消恐則氣下怒則氣上思則氣結喜則氣緩凡此數傷皆傷氣也以有涯之氣而日犯此數傷欲其不虛難矣虛而不補氣何由行或問丹溪曰人身之虛皆陰虛也若果陽虛則暴絕死矣是陽無益於補也又曰氣無補法世俗之言也氣虛不補何由而行是氣又待於

補也何言之背戾耶予曰經云衛氣者水谷之悍氣也慄疾不受諸邪此則陽常有餘無益於補者也朱子曰天之陽氣健行不息故閤得地在中間一息或停地即陷矣與丹溪所謂陽虛則暴絕同一意也此固然矣使陰氣若虛則陽亦無所依附而飛越矣故曰天依形地附氣丹溪曰陰先虛而陽暴絕是知陽亦賴陰而有所依附也此丹溪所以拳拳於補陰也經曰營氣者水谷之精氣入於脉內與息數呼吸應

此即所謂陰氣不能無盈虛也不能不待於補也分而言之衛氣為陽營氣為陰合而言之營陰而不稟衛之陽莫能營晝夜利關節矣古人於營字下加一氣字可見衛固陽也營亦陽也故曰血之與氣異名而同類補陽者補營之陽補陰者補營之陰又況各經分受有氣多血少者有血多氣少者倘或為邪所中而無損益則藏府不平矣此內經所以作而醫道所以興也譬如天之日月皆在大氣之中分而言之

日為陽月為陰合而言之月雖陰而不稟日之陽則不能光照而運行矣故古人於陰字下一氣字可見陽固此氣陰亦此氣也故曰陰中有陽陽中有陰陰陽同一氣也周子曰陰陽一太極是也然此氣有虧有盈如月有圓有缺也聖人裁成輔相即醫家用藥損益之義也是知人參黃芪補氣亦補營之氣補營之氣即補營也補營即補陰也可見人身之虛皆陰虛也經曰陰不足者補之以味參芪味甘甘能生

血非補陰而何又曰陽不足者溫之以氣參芪氣溫
又能補陽故仲景曰氣虛血弱以人參補之可見參
芪不惟補陽而亦補陰東垣曰血脫益氣仲景曰陽
生陰長義本諸此世謂參芪補陽不補陰特未之考
耳予謂天之陽氣包括宇宙之外即易所謂天行健
內經所謂大氣舉之者是也此氣如何得虛虛則不
能畜住地矣天之陰聚而成形形者乃地之坤也
故曰天依形地附氣可見人身之衛即天之乾人身

之形即地之坤營運於藏腑之內者營氣也即天地中發生之氣也故以氣質言衛氣為陽形質為陰以內外言衛氣護衛於外為陽營氣營養於內為陰細而分之營中亦自有陰陽焉所謂一陰一陽互為其根者是也若執以營為衛配而以營為純陰則孤陰不長安得營養於藏府耶經曰營為血而血即水朱子曰水質陰而性本陽可見營非純陰矣況氣者水之母且天地間物有質者不能無虧盈既有質而虧

盈血中之氣亦不免於虧盈矣故丹溪以補陰為主
固為補營東垣以補氣為主亦補營也以營兼血氣
而然也

答提學黃公如金所惠書

生樸檄小材山林迂士其於岐黃之書盧扁之術僅惟
得其糠粃而已升堂入室誠有所未能也茲蒙召置左
右以脩顧問夙夜祇懼惟恐弗堪雖然一得之愚不敢
不盡是以忘其固陋謹述以聞古人所謂芻蕘之言狂

夫之語庶幾或有可采者也伏惟天寬地容海涵春育人不求備才不求全片言有取寸長必錄又且不作聰明不大聲色靡恃其長毋執其見舍己從人不知有彼此之別使各得以紓其情也用上敬下相忘於勢利之場俾皆得以盡其辭也是知所言或謬殆必視如道傍苦李唾而去之而已必不索我於形骸之外以言而見責焉然生侍側有日聆誨已久因而察其受病之源詳其致病之因不過心過於勞而已何則心為血主而血

又所以養心血屬陰而主靜惟靜則可以生水故曰靜則生陰是也苟或心過於勞則主動而屬陽矣陽則火之象也故曰動則生陽丹溪亦曰諸動屬火動極火熾陽亢陰微血愈虧損而心失所養矣是以睡卧不寧夜夢紛紜職皆由於此也經云主閉藏者腎也腎主相火上係於心心既動勞則相火隨起而熱則流通矣是以閉藏之腎反暗流疎瀉而夢遺精滑之疾有所不能免矣醫書所謂情動於中精淫於外是也經云東方實西方

虛心勞火動則西方之金愈虛而東方之木愈實脾土
得不為之傷乎脾土既傷是以上或為嘔下或為瀉中
或畏食之病莫不層出而疊見矣由是探本索元其初
固在於心而支流餘裔不免延及他臟而亦有所損也
又嘗參之以脉夫左寸心脉所出也或時而浮洪或時
而歛小蓋由心之勞逸不常以致脉之大小無定勞則
心動而火熾故脉為之浮洪而躁擾逸則心安而氣和
故脉為之歛小而恬靜所可喜者肝腎二部脉靜而有

常久而不變是知相火雖或有時而動而勢未至於燎
原也故今病未即瘳而終有可瘳之理邪未即伏而終
有可伏之機尚復何慮之有右手三部肺脾命脉之所
出也亦或浮而稍洪又或小而稍弱良由火來侮肺又
乘於脾遂延及命門以致然耳故曰火性躁擾強越其
燔灼之禍無不著於物也或時小而稍弱者蓋府藏之
陰血陽氣未免為火暗傷而陰損故火旺之時脉來浮
洪而獨見火象及火靜之後則邪伏而虛見矣脉之小

而弱者寧不基於此乎或曰血為火銷吾固聞其說矣而氣當賴之以為助何謂亦傷其陽乎經曰少火生氣壯火食氣夫少火固可以生氣而壯火火之旺甚也安得不食其氣而損之乎又曰熱傷氣故暑月多致人無氣以動怠惰嗜卧可見火之傷氣不待辨而明矣又何疑之有哉生於是察其脉切其病反復精思參互考証其所治之方無出於八物湯之外也或者專主四物滋陰加黃栢知母玄參生地之屬以降火此固一說也未

免寒傷胃氣而嘔瀉畏食之病莫能去矣或者專主四君子以養陽加溫煖消導燥熱之劑以助胃此亦一理也未免陽剛傷陰而夜夢遺精之患不能除矣求其萬舉萬全而無一偏之害者還當以八物為主一則可以養陰而心火不至於太熾一則可以養陽而脾土不至於太傷其他清金降火安神固腎之藥又當因其時月之宜酌其病之輕重更相出入遞為佐使庶得變通之妙而免執中無權之誚矣守此以治而謂病之不痊吾

未之信也抑猶有說焉夫人生氣交之中孰能無欲所謂欲者非特色欲之欲凡耳之於聲目之於色鼻之於臭口之於味皆所謂欲也周子曰欲動則情熾熾從火則火之熾可知矣丹溪所謂諸動屬火其原蓋出於此歟故聖賢教人不欲窒欲則曰寡欲此善治乎火也不此是務而惟日以百憂感其心萬事勞其形惟恃刀圭之劑以求旦夕之功是謂舍本而逐末徇外以遺內也豈自根自本之論哉今之所患誠能內觀以養神存心

以養性則水可升火可降坎離交而地天泰矣又何待
於籠中物耶且胃氣者清純冲和之氣也凡藥之氣皆
偏非若五穀可常食也苟不知此而惟藥之是耽則胃
氣之存者幾希矣有志養生者不可以不謹生既以症
治之方而詳之於前復以存養之要而申之於後無非
致其叮嚀忠愛之意也伏乞高明議之以訂是否

條答福建舉人謝邦實所患書

一所示大便多燥而色赤竊意燥赤亦熱所為

大便燥赤固熱所為亦挾血虛蓋大腸屬陽明燥金
血旺則便潤血少則便燥且腎主大便而亦屬血也
由此論之則血虛兼熱為兩盡矣

一所示夜卧少寧舌生黑胎唇口焦燥靜養服藥二三
日胎始退不知降火去胎之藥更有何方法唇舌焦
乾更何調理

此項數病皆生於心何則心主血脉心血一虧則陽
熱隨起故夜卧不寧唇舌焦燥黑胎之病層出而疊

見矣且舌乃心之苗心火亢極故舌生黑胎靜養二
三日而始退者蓋靜養則陰生陰生則陽伏矣周子
所以定之以中正仁義而主靜者良以此也降火去
胎潤唇滋燥之藥恐無出於四物再加麥門冬五味
黃柏知母之屬

一所示目力亦短五步之內於人多不能識直視天日
惟濛濛紛紛白花矣白精血縷不斷睡醒反清淚
東垣云能遠視不能近視氣有餘血不足也能近視

不能遠視血有餘氣不足也今貴目既不能視遠又不能視近此氣血俱不足也直視天日惟見白花白花乃肺之象何則肺為氣主屬金而燥肺金一虛火來易侮且天與日皆陽火也虛金受侮於天日之陽火故白花紛紛散漫而見於前矣白精血縷不斷睡醒反漬淚者屬於肝火之動也經云肝熱甚則出淚是矣所治之方要當滋腎水以制火保肺氣以畏木則眼中諸疾雖不期愈而自愈矣然加減補陰丸正

與病對先生宜詳審之

一所示腎覺衰甚不敢勞動惟有患則腰足痠痛或右
腎痠疼或久立或勞皆然意區區氣病居多故所患
右體偏多見鬚白眼赤多自右為甚

夫人之一身氣血周流細而分之則氣屬於右血屬
於左氣屬於右則右體不免氣旺而血劣也且先生
亦中年已後血氣日減加之右體氣旺血劣宜乎腰
足痠疼右腎時痛鬚白眼赤之症多見於右也補腎

藥方亦無出於加減補陰丸藥生當別楮以呈

一所示勞倦時小便旁射散逆如絲不得順直意皆氣之不足藥之不專勞而失養然歟

此條先生以為氣之不足藥之不專勞而失養之所致以予觀之誠不出此三之外但先生徒托諸空言不見諸行事是以病根不除時作而時止矣

一所示近來腰復微痛坐久屈伸不便右側腰腿相接處曰環跳穴旁多酸痛

夫腰者腎之外候蓋由腎水衰虛於內以致腎之外候或微痛或屈伸不便或環跳穴旁酸痛也環跳雖屬膀胱膀胱亦腎之府未有藏病而府不病也

一示孤骨下間有火熱或升於右腳股一團三指許有時微熱如燈照

丹溪有曰火自湧泉穴起者乃火起自九泉也孤骨須亦屬於膀胱與腎相為表裏而又近於湧泉即此觀之是亦腎水衰少不足以制火而火起於九泉之

類也此宜滋養腎水以制妄火經云滋陰水以制陽光是也

疫

一人年弱時房勞後忽洒洒惡寒自汗發熱頭闕胃脘皆痛唇赤舌強嘔吐眼胞青色醫投補中益氣午後譫語惡熱小便長初日脉皆細弱而數次日脉則浮弦而數醫以手按臍下痛誼欲下之遣書來問予曰疫也疫兼兩感內傷重外感輕耳臍下痛者腎水虧

也若用利藥是殺之也古人云疫有補有降有散茲
宜合補降二法以治別清暑益氣湯除蒼朮澤瀉五
味加生地黃芩石膏服十餘貼即安

瘧

邑人汪大尹年幾七十形色蒼白勞倦病瘧瘧止胸膈
痞悶心惡痰多不思飲食懶倦口苦頭痛夜夢紛紜
兩腿時癢予為診之脉皆浮濡無力且過於緩醫書
云脉緩無力者氣虛也又云勞則氣耗又云勞倦傷

脾脾傷不能運化精微以養其心故心神為之不安
宜做歸脾湯例治之人參二錢麥門冬白朮各一錢
歸身酸棗仁茯神各八分黃芩陳皮各六分枳實甘
草各五分川芎七分煎服二貼夜卧頗安但藥後覺
嘈食則吞酸口淡減去枳實加山查七分吳茱萸二
分服之仍用參朮歸芎山枝山查丸服而愈

一人年逾四十形瘦色紫淡素勞傷脾子令常服參苓
白朮散獲安住藥一年復勞飲冷酒不爽是夜頭又

被濕遂致身冷不安早起面目俱黃醫用零筋草根
酒煎服之吐瀉大作又加姜煎則心熱膈壅不進飲
食大便秘結瘡作胸膈痞塞粥飲不入食此湯則噉
此氣哕逆吐涎意向甚惡予診左脉浮濡無力肝脉
頗弦右脉肺部濡散脾部浮微二部脉皆似有似無
或呼攻相引又覺應指曰此脾虛之極也初因勞熱
飲冷頭又被濕內熱因鬱故發為黃若用搐藥以泄
上焦濕熱則黃自退乃用草藥酒煎濕熱雖行而脾

氣存也幾希且勿治瘡當用補脾為急用人參五錢
橘紅一錢時時煎湯呷之令其且莫食粥以回胃氣
彼如所言旬餘乃愈

一人年逾四十不肥不瘦形色蒼白季秋久瘡醫用丹
劑一丸止之嘔吐不休粒米不入大便或瀉面赤妄
語身熱予診脉皆浮而欲絕仲景云陽病得陰脉者
死今面赤身熱妄語其症屬陽而脉微欲絕則陰脉
矣此一危也經曰得穀者昌失穀者亡今粒米不入

此二危也又曰泄而熱不去者死今數泄瀉而面赤身熱不除此三危也以理論之法在不治古人云治而不愈者有也未有不治而愈者也今用人參五錢白朮二錢御米一錢橘紅八分煎服四貼漸有生意一人年近三十形瘦淡紫八月間病瘥予診之左脉頗和而駛右脉弱而無力令用清暑益氣湯加減服之覺胸膈痞悶遂畏人參更醫作瘥治而瘥或進或退服截藥病稍增延至十月復邀予診脉皆浮小而濡

帶數右則尤近不足曰正氣久虛邪留不出瘡尚不止也宜用十全大補湯減桂加苓倍參服之漸愈一人年逾三十形瘦色蒼八月間病瘡或用截藥或用符水延纏不愈胸膈痞滿飲食少進大腸痔血小便短赤瘡發於夜寒少熱多自汗予診左脉濡小而緩右脉濡弱無力曰此久瘡傷脾也用人參二錢白朮歸身茯苓各一錢芍藥八分黃芩七分枳實五分陳皮六分甘草四分煎服後因痔血未止吞槐角丸而

血愈多仍服前方而血減矣

一婦面色淡紫年逾四十九月病瘧夜發渴多汗嘔吐
粒食不進數日予診脉皆浮濡而緩按之無力遂用
人參五錢橘紅八分甘草七分白朮一錢煎服十餘
貼瘧止食進漸有生意但大便二十日不通再診右
脉浮小無力左脉沉弱無力前方加歸身一錢火麻
仁錢半如舊煎服病除

一婦年逾三十瘦長淡紫六月產八月瘧瘧止胸膈痞

悶纔勞氣喘咳血身熱脚冷予診左脉濡弱右脉肺部頗洪關尺二部亦弱以生地黃白芍麥門冬白朮各一錢阿膠歸身牡丹皮各七分人參八分陳皮五分煎服一貼再令熱服瀉止膈快但盜汗而脚即軟矣前方加黃芪錢半黃栢七分依前煎服而安

一人年三十形色蒼白因勞感熱九月盡病瘡頭痛口渴嘔吐胸膈痞塞不進飲食自汗倦怠熱多寒少醫用截藥病增過飲水吐甚予診脉皆浮大而濡頗弦

曰此勞倦傷脾熱傷氣之瘥也令用人參三錢黃芪
錢半白朮麥門冬各一錢枳實五分山查七分歸身
黃栢知母各七分乾姜甘草各三分煎服三貼病減
復勞病作前方人參加作四錢服之向安

一人年三十久瘥醫用補中益氣湯或止或作延及半
年因解髮結勞傷咳嗽醫以前方加半夏五味遂致
喉痛聲啞夜不能寢邀予視之右脉浮濡左脉小弱
曰經云陰火之動發為喉痺是也此必色欲不謹久

服參芪徒增肺中伏火耳令以甘桔湯加鼠粘子蜜炙黃柏煎服二貼喉痛除而聲出繼服保和湯五貼而安

一人年三十餘形瘦淡紫素勞久瘥三日一發於夜嘔吐熱多寒少不進飲食小便頻數氣喘咳嗽日夜打坐不能伏枕幾月矣頭身骨節皆痛醫作瘥治病甚衆皆危之脉皆浮虛緩弱而不甚大予以參朮加陳皮黃柏枳實知母麥門冬北五味煎服三貼病退越

二日復病令用四物加童便服之則嗽除喘止始能就卧再用八物湯除茯苓加枳實香附又用枳朮丸加人參砂仁歸身黃芩吞服調理熱來常服童便半年而安

一婦形色脫白年五十餘憂勞六月背瘡艾灸百餘壯瘡散病瘥身熱自汗口渴頭暈嘔吐泄瀉不進飲食寒少熱多自用清暑益氣湯病甚予診左脉浮微似有似無右脉浮小按之不足曰病雖屬瘥當作虛治

依方而用清暑益氣固與病宜但邪重劑輕病不去
耳令以參朮加作五錢芪三錢茯苓一錢陳皮七分
甘草五分煎服病退

一人於嘉靖九年因冒風病瘥熱多寒少頭痛倦怠食
少自汗已服參蘇飲一貼予適在彼診之脉皆浮虛
近駛曰此虛瘥也非參蘇飲所宜令將平日所服參
芪歸朮等藥煎服五六貼而愈且諭之曰元氣素虛
不宜發散凡遇一切外感必須以補元氣為主少加

發散之藥以輔佐之庶為允當宜永識之

一婦常患咳嗽加以瘡疾因仍左脇有塊瘡止有孕嗽尚不寧喉乾痰少或時嘔出頑痰鐘許方止夜亦如是常覺熱盛胸膈壅滿背心亦脹常要打摩妊已六月夜半如廁身忽寒戰厚覆少頃乃愈越兩日夜半又發寒熱如瘡肢節痛上身微汗口中覺吐冷氣胸喉如有物礙心前虛腫按之即痛頭痛氣喘坐卧不寧醫作傷寒發散又作痰症而用二陳不效予往視

之脉皆濡而近滑曰胃虛血熱也先以四君子湯加黃芩枳殼麥門冬煎服二三貼以保胃氣繼以四物湯加枳榔枳殼麻仁大黃三服下之遂滯下後重虛坐努責怠倦不食時或昏悶亂叫食則脹不食饑四肢痛脚腫予曰胃虛非湯藥所宜令合枳朮凡加人參當歸黃芩服月餘諸症悉除胎亦無損

一人形瘦色脆年幾三十正德十年四月腹痛惟覺氣轉左邊五日而止次年四月亦然八月病瘥間日一

發寒少熱多十餘日止第三年四月八月如舊腹痛
瘡作四年五年四月八月亦然但瘡作腹痛瘡止痛
止旬餘瘡除又瀉痢十餘日瀉止瘡又作但不腹痛
五日瘡瘡仲冬感寒頭痛發熱腹及右脇脹痛氣喘
溇瀉內黑外紅日夜五六次內熱不減飲食難進醫
用三乙承氣湯二貼繼用木香枳朮丸諸症稍定午
後內熱愈熾遇食愈脹得瀉畧寬頭痛不減詣予診
治脉皆浮濡近駛曰氣屬陽當升虛則下陷矣又屢

服消尅攻下之劑所謂虛其虛也安得不脹而頻瀉乎經云下者舉之其治此病之謂歟或曰脹滿者氣有餘也積塊者氣固結也經云結者散之有餘者損之今有餘而補固結而益何謂予曰人身之氣猶天之風風性剛勁揚沙走石孰能禦之孟子曰至大至剛是也餒則為物障礙反以為病若能補養以復其剛大之性則衝突排蕩又何脹滿不散積塊不行經曰壯者氣行則愈怯者著而成病是也蓋氣之強壯

者則流動充滿或有積滯亦被衝突而行散矣何病之有氣之怯弱則力小遲鈍一有積滯不免因仍承襲積著成病故此病法當升陽益胃遂以參苓白朮散煎升麻湯調服月餘仍令丸服一料而愈

一人形瘦色脆年三十餘八月因勞病瘡寒少熱多自汗體倦頭痛痞畧欬而渴惡食大便或秘或溏發於寅申巳亥夜醫誼欲從丹溪用血藥引出陽分之例治之予診其脉濡弱近駛稍弦曰察形觀色參脉

乃屬氣血兩虛瘡已深入厥陰矣專用血藥不免損胃又損肺也淹延歲月久瘡成癆何也自汗嗽渴而蒼朮白芷豈宜例用惡食胸痞而血藥豈能獨理古人用藥立例指引迷途耳因例達變在後人推廣之也遂以補中益氣湯加川芎黃柏枳實神麴麥門冬倍用參芪朮煎服三十餘貼諸症稍除瘡猶未止乃語之曰今當冬氣沉潛瘡氣亦因之以沉潛難使浮達况汗孔亦因以閉塞經曰瘡以汗解當此閉藏之

時安得違天時以汗之乎且以參朮枳實陳皮歸身黃芩丸服胃氣既壯來年二月瘧當隨其春氣而發泄矣果如期而安

一人年三十形色頗實初因舟行過勞受熱咳嗽不已續又病瘧素有熱淋求醫服藥或作或輟回家予為診之脉皆濡弱近緩左尺畧駛曰此熱傷氣也肺為氣主氣傷肺亦傷矣故發咳嗽其瘧亦因熱而作令用人參錢半白朮麥門冬茯苓各一錢歸身知母各

七分青皮黃栢甘草各五分煎服而安九月復舟行
過勞感熱其瘡復作或一日一發或二日一發或三
日一發或連發二日回家醫作瘡治不效仍用前方
煎服遂安

一人年三十六月因勞取涼夢遺遂覺惡寒連日慘慘
不爽三日後頭痛躁悶家人診之驚曰脉絕矣議作
陰症欲進附子湯未決邀予往治曰陰症無頭疼今
病如是恐風暑乘虛入於陰分故脉伏耳非脉絕也

若進附子湯是以火濟火安能復生姑待以觀其變
然後議藥次日未末申初果病寒少熱多頭痛躁渴
痞悶嘔食自汗大便或瀉或結脉皆濡小而駛脾部
兼弦此非尋常驅瘧燥烈劫劑所能治遂用清暑益
氣湯減蒼朮升麻加柴胡知母厚朴川芎以人參加
作二錢黃芪錢半白朮當歸各一錢煎服二十餘貼
而愈

本縣二尹大人北人形長魁偉年逾四十六月舟中受

熱病瘥寒少熱多頭疼躁渴汗多醫用七保飲治之
不愈予診其脉浮濡而駛畧弦曰此暑瘥也以白虎
湯加人參三錢煎服十餘貼而瘥止

侍御程公形色清脆年餘四十素善飲形色蒼熱病頭
痛惡食泄瀉小便短少午後惡寒發熱醫用二陳平
胃五苓共一服治不退反增腰腹拘急邀予診視脉
皆濡弱頗弦而駛曰耗血傷胃惟酒為甚復加以時
熱外傷其氣內外兩傷法當從補若用草菓檳榔常

山半夏燥烈之劑譬猶抱薪救火寧不益其病耶遂
以人參二錢黃芪錢半以益皮毛不令汗泄白朮茯
苓石膏麥門冬各一錢以導濕熱不使傷胃知母青
皮神麴黃芩歸身川芎柴胡各七分以消積滯而和
表裏少加甘草三分煎服十餘貼瘡止後以參苓
散常服收功

一人年三十餘八月因勞病瘡詣予診治脉皆六至而
數無力曰古人云形瘦色黑者氣實血虛也又云脉

數無力者血虛也間日發於午後亦血分病也以色
脉論之當從血治但今汗多乃陽虛表失所養消穀
善饑乃胃虛火乘其土皆陽虛也仲景法有憑症不
憑脉者茲當憑症作陽虛治以參芪各三錢白朮白
芍麥門冬各一錢歸身生地甘草各七分黃柏知母
陳皮各五分煎服二十餘貼而安若用尋常驅瘡劫
劑寧免後艱

予年逾六十形質近弱八九月酷熱時往來休歛外有

藥劑之功內有病者之憂內外弗寧晝夜不靜至十月初旬瘡作三日午後一發寒不甚寒熱不甚熱喜熱惡寒寒去熱來則爽快矣口乾微渴臨發昏倦嗜卧左脉沉小而數右脉浮濡無力亦近於數獨脾部弦而頗洪瘡去則脉皆大小浮沉相等惟覺緩弱而矣初服補中益氣湯十餘貼病無加減夜苦盜汗繼服當歸六黃湯黃芪每貼四錢五貼汗止瘡如舊再服白虎湯人參四錢石膏三錢知母一錢甘草六分

米一撮煎服十餘貼而瘡止矣

一人瘦長脆白年三十餘久瘡後盜汗自汗過多加以傷食吐瀉大作吐止而瀉四日不住筋惕肉瞤驚悸夢遺小便不禁予診脉皆緩弱右則畧弦而濡曰此下多亡陰汗多亡陽氣血虛也遂以參芪為君白朮為臣山枝麥門冬牡蠣為佐酸棗歸身山查為使加以薄桂煎服旬餘諸症稍退半年之間常覺臍下內熱一團烘烘不散時或夢遺浮梁孫醫誼作熱鬱固

欲下之予曰此非有餘之熱乃陰虛生內熱耳若欲下之是殺之耳宜以前方加黃柏熱當自退果驗一人年十七八時因讀書饑感寒得瘡延纏三年瘡愈寒氣臍左觸痛熱熨而散仍或發或止後因新娶往縣復受饑寒似病傷寒吐二日夜不止接服理中湯補中益氣湯固本丸補陰丸猪肚丸其吐或作或止飲食或進或不進續後受饑勞倦食則飽悶予至午前睡安畧爽食稍進午後氣升便覺脹悶胸膈漉漉

水響四肢微厥吐水或酸或苦亦有間日吐者大便燥結小便赤短身體瘦弱不能起止予曰須不見脉見症必是稟賦素弱不耐饑寒宜作飲食勞倦為主而感冒一節且置諸度外夫氣升脹悶觸痛者脾虛不能健運以致氣鬱而然胸膈漉漉水聲謂之留飲乃用獨參湯補養其氣血加姜以安其嘔吐黃栢以降其逆氣初服三貼臍左痛除吐止將人參加作一兩吐又復作此由補塞太過而無行散佐使故也人

次々人口増加

濕濕鬱為熱而水作酸苦也姜附性熱辛散濕逢熱則收鬱逢熱則散濕收鬱散酸苦自除大便燥結者由吐多而亡津液也小便短少由氣虛不能運化也茲用人參以養血氣則血潤燥除氣運溺通矣若用苦寒之藥則苦傷血寒傷氣寧不愈益其病哉日輕夜重為血病者道其常也此則不然須似血病而實氣病也醫作血病而用固本補陰等藥反不解非血病可知所以日輕者日則陽得其位而氣旺故病減

夜則陽失其位而氣衰故病重經曰至於所生而持
自得其位而起是也故病則有常有變而醫不可不
達其變也病將愈猶或鼻衄數點者此浮溜之火也
如山枝氣味薄者以潛伏之久當自愈後聞食母猪
肉前病復作予曰臟腑習熟於藥病亦見化於藥再
無如之何矣

鼻衄流涕

一人形近肥而晚年三十餘內有寵妻三月間因勞感

熱鼻衄久而流涕不休臭穢難近漸至目昏耳重食少體倦醫用四物涼血或用參芪補氣罔有效者邀予診視脉皆浮濡而滑按之無力曰病不起矣初因水不制火肺因火擾涕流不休經云肺熱甚則出涕是也況金體本燥津液日泄則燥者枯矣久則頭面諸陽之液亦因以走泄經云枯澁不能流通逆於肉理乃生癰腫是也予歸月餘面目耳傍果作癰瘡而卒後見流涕者數人亦多不救

脇痛

子婿王琇客揚州病脇痛醫以為虛用人參羊肉補之其痛愈甚鎮江錢醫治以龍會丸痛減子聞冒雪自蕪湖徒行至彼診之脉皆弦濡而弱曰脾胃為痛所傷尚未復也遂用橘皮枳朮丸加黃連當歸服之而安越五年腹脇挿痛彼思頗類前病欲服龍會丸未決予又衝寒陸路至彼遂親扶持不成寐者數晚診之脉皆濡弱而緩曰前病屬實今病屬虛非前藥可

治也遂以人參為君芎歸芍藥為臣香附陳皮為佐
甘草山枝為使煎服十餘貼痛止而食進矣又後十餘
年來賀予壽病滯下腹痛後重日夜四五十行診之
脉皆濡弱近馭曰此熱傷血也以四物加檳榔大黃
下之四五行腹痛稍減後重不除仍用前方除大黃
服十餘貼續吞香連凡獲安三病予三起之其勞甚
矣情係丈婿恩同父子不知彼以父視我乎以人視
我乎

黔縣丞年逾五十京回兩脇肋痛醫用小柴胡湯痛止
續後復痛前方不効請予往治脉皆弦細而濡按之
不足曰此心肺為酒所傷脾腎為色所損兩脇脹痛
相火亢極肝亦自焚經云五臟已虛六府已極九候
須調者死此病之謂歟果卒

鼓脹

一人年逾四十春間患脹醫用胃苓湯及雄黃傳貼法
不効邀予診視脉皆緩弱無力曰此氣虛中滿也曾

通利否曰已下五六次矣子曰病屬氣虛醫反下之下多亡陰是謂誅罰無過也故脉緩知其氣虛重按則無知其陰亡陽虛陰亡藥難倚仗八月水土敗時實可憂也乃問予曰今不與藥病不起耶嘗聞脹病臍突不治肚上青筋不治吾今無是二者予曰然也但久傷於藥故且停服明日遂歸如期果卒

一婦形瘦弱小脉細濡近駛又一婦身中材頗肥脉緩弱無力俱病鼓脹大如箕垂如囊立則垂墜遮攔兩

腿有礙行步邀予視之曰腹皮寬綰已定非藥可斂也惟宜安心寡欲以保命爾後皆因產而卒或曰鼓脹如此何能有孕予曰氣病而血未病也產則血亦病矣陰陽兩虛安得不死又一婦瘦長蒼白年餘五十鼓脹如前二婦頗能行立不耐久遠越十餘年無恙恐由寡居血無所損故得久延

一人年踰四十瘦長善飲診之脉皆洪滑曰可治脉訣云腹脹浮大是出厄也但濕熱太重宜遠酒色可保

終吉遂以香連丸今日吞三次每服七八十九月餘
良愈

一人年三十餘酒色不謹腹脹如鼓醫用平胃散廣茂
潰堅湯不効予為診之脉皆浮濡近駛曰此濕熱甚
也遠酒遠色庶或可生彼謂甚畏湯藥予曰凡藥亦
可遂以枳朮丸加厚朴黃連當歸人參荷葉燒餃丸
服一月果安越三餘月不謹復脹再為診之曰不可
為也臍突如脹長二尺餘逾月而卒臍突寸餘者有

矣長餘二尺者亦事之異故為記之

莖中蟲出

休邑西山金舉人嘗語人曰渠嘗病小腹甚痛百藥不應一醫為灸關元十餘壯次日莖中淫淫而癢視之如蟲出四五分急用鐵鉗扯出果蟲長五六寸連日蟲出如此者七條痛不復作初甚驚恐後則視以為常皆用手扯此亦事之偶中也仲景云火力須微內攻有力蟲為火力所逼勢不能容故從溺孔出也其

人善飲御內膀胱不無濕熱遇有留血瘀濁則附形
蒸鬱為蟲矣經云濕熱生蟲有是理也故癆蟲寸白
蟲皆由內濕熱蒸鬱而生非自外至者也正如春夏
之交濕熱鬱蒸而諸蟲生焉是矣此亦奇病故記之
身痒

一人年逾六十形瘦蒼紫夜常身痒搔之熱蒸皮內肉
磊如豈粒癢止熱散肉磊亦消矣醫用烏藥順氣升
麻和氣等不効詣予診之脉皆細濡近駛曰此血虛

血熱也醫為順氣和氣所謂誅罰無過治非所宜遂
以生地玄參白茯苓歸芍芩芍黃芩甘草陳皮煎服
月餘而愈

膈噎

一人年六十餘色紫平素過勞好酒病膈食至膈不下
則就化為膿痰吐出食肉過宿吐出尚不化也初卧
則氣壅不安稍久則定醫用五膈寬中散丁沉透膈
湯或用四物加寒涼之劑或用二陳加耗消之劑罔

有効者來就予治脉皆浮洪弦虛予曰此大虛症也
醫見此脉以為熱症而用涼藥則愈助其陰而傷其
陽若以為痰為氣而用二陳香燥之劑則愈耗其氣
而傷其胃是以病益甚也況此病得之酒與勞也酒
性酷烈耗血耗氣莫此為甚又加以勞傷其胃且年
踰六十血氣已衰脉見浮洪弦虛非吉兆也宜以人
參三錢白朮歸身麥門冬各一錢白芍藥八分黃連
三分乾姜四分黃芩五分陳皮七分香附六分煎服

五貼脉歛而膈頗寬食亦進矣

淋

一人形肥蒼白年五十餘病淋沙石澀痛醫用五苓或琥珀八政散之類病益加邀予往診脉皆濡弱而緩近駛曰此氣血虛也經云膀胱者津液之府氣化出焉今病氣虛不惟不能運化蒸溽而亦氣餒不能使之出也經又云血主濡之血少則莖中枯澀水道不利安得不淋醫用通利血愈燥氣愈傷矣遂用大補

湯加牛膝煎服月餘病減仍服八味丸除附子加黃芪服半月餘遂獲安

眼目

一婦年逾四十兩眼昏昧咳嗽頭痛似鳴而痛若過饑惡心醫以眼科治之病甚予診脉皆細弱脾部尤近弦弱曰脾虛也東垣云五臟六府皆稟受於脾上貫於目脾虛則五藏精氣皆失所司不能歸明於目矣邪達其身之虛隨眼系入於腦則腦鳴而頭痛心者

君火也宜靜相火化行其令勞役運動則妄行侮其所勝故咳嗽也醫不理脾養血而以苦寒治眼是謂治標不治本乃用參芪錢半麥門冬貝母各一錢歸身八分陳皮川芎黃芩各七分甘草甘菊花各五分麥芽四分煎服二貼諸症悉除

白濁

一人年逾三十季夏日午房後多汗晚浴又近女色因患白濁醫用胃苓湯加右眼作痛用四物湯入三黃服

之睡醒口愈加苦又加左膝腫痛仲冬不藥濁止漸次延至背痛不能轉側日輕夜重嚏則如繩束撮腰脇痛不可忍呵氣亦應背痛或時夢遺次年正月請予診治脉皆緩弱無力左脉緩而畧滑曰此脾腎病也夫緩脾脉也緩弱無力脾虛可知左脉滑者血熱也遂以人參黃芪各二錢茯苓歸身麥門冬各一錢牛膝神曲陳皮黃柏各七分甘草五味各五分煎服三十餘貼仍以龜板參芪黃柏各二兩熟地山茱萸

枸杞杜仲歸茯苓牛膝各一兩丸服而愈

咳嗽

一人形長色蒼瘦年逾四十每遇秋涼病痰嗽氣喘不能卧春暖即安病此十餘年矣醫用紫蘇薄荷荆芥麻黃等以發表用桑白皮石膏滑石半夏以疏內暫雖輕快不久復作予為診之脉頗洪滑曰此內有鬱熱也秋涼則皮膚緻密內熱不能發泄故病作矣內熱者病本也今不治其本乃用發表徒虛其外愈不

能當風寒疏內徒耗其津愈增鬱熱之勢遂以三補丸加大黃酒炒三次貝母瓜蒌丸服仍令每年立秋以前服滾痰丸三五十粒病漸向安

一婦年逾五十其形色脆弱每遇秋冬痰嗽氣喘自汗體倦卧不安席或嘔惡心診之脉皆浮緩而濡曰此表虛不禦風寒激內之鬱熱而然遂用參芪各三錢麥門冬白朮各一錢黃芩歸身陳皮各七分甘草五味各五分煎服十餘貼而安每年冬寒病發即進此

藥次年秋間滯下腹痛後重脉皆濡細稍滑予曰此
內之鬱熱欲下也體雖素弱經云有故無損遂以小
承氣湯利兩三行腹痛稍除後重未退再以補中益
氣湯加枳壳黃芩芍藥煎服仍用醋澆熱磚布裹坐
之而愈是年遇寒嗽喘亦不作矣

一婦產後咳嗽痰多晝輕夜重不能安寢飲食無味或
時自汗醫用人參清肺湯嗽愈甚予為診之脉浮濡
近駛曰此肺熱也令服保和湯五貼而安

一婦懷妊七月嗽喘不能伏枕兩臂坐久皮皆潰爛醫
用蘇子降氣湯三拗湯參蘇飲罔有効者邀予診之
右脉浮濡近駛按之無力左脉稍和曰此肺虛也宜
用補法遂以人參錢半白朮麥門冬各一錢茯苓八
分歸身阿膠黃芩各七分陳皮五味甘草各五分煎
服五七貼而痊

一童子八歲傷寒咳嗽痰少面赤日夜不休丁氏小兒
科治以參蘇飲數日嗽甚予為診之脉洪近駛曰熱

傷肺也令煎葛氏保和湯二服如失

氣痛

氣逆

一婦瘦弱年四十餘患走氣遍身疼痛或背脹痛或兩脇挿痛或一月二三發發則嘔盡所食方快飲食不進久伏床枕醫作氣治用流氣飲或作痰治用丁藿二陳湯病甚邀予視之脉皆細微而數右脉尤弱曰此恐孀居憂思傷脾而氣鬱也理宜補脾散鬱以人參三錢香附砂仁黃芩甘草各五分黃芪二錢歸身

錢半川芎八分乾姜四分煎服十餘貼脉之數而弱者稍緩而健諸痛亦減仍服前方再用人參黃芪川芎香附山枝甘草以神麴糊丸服之病除

邑庠司訓蕭先生年逾五十形肥色紫病氣從臍下冲逆而上睡卧不安飲食少精神倦予為診之脉皆浮濡而緩曰氣虛也問曰丹溪云氣從臍下起者陰火也何謂氣虛予曰難執定論丹溪又云肥人氣虛脉緩亦氣虛今據形與脉當作氣虛論治遂以參芪為

君白朮白芍為臣歸身熟地為佐黃栢甘草陳皮為使煎服十餘貼稍安彼以胸膈不利陳皮加作七分氣冲上仍守前方月餘而愈


身麻

一婦或時遍身麻痺則惜不省人事良久乃甦醫作風治用烏藥順氣散又用小續命湯病益甚邀予診之脉皆浮濡緩弱曰此氣虛也麻者氣餒行遲不能接續也如人久坐膝屈氣道不利故伸足起立而麻者

是也心之所養者血所藏者神氣運不到血亦罕來
由心失所養而昏懵也遂用參芪各二錢歸身茯苓
門冬各一錢黃芩陳皮各七分甘草五分煎服而愈
秘結

一婦嫠居改嫁乘轎勞倦加以憂懼成婚之際遂病小
腹脹痛大小便秘結不通醫以硝黃三下之隨通隨
閉病增胸膈胃脘脹痛自汗食少予為診之脉皆濡
細近駛心脉頗大右脉覺弱予曰此勞倦憂懼傷脾

也蓋脾失健運之職故氣滯不行以致秘結今用硝
黃但利血而不能利氣遂用人參二錢歸身錢半陳
皮枳壳黃芩各七分煎服而愈



石山醫案卷上

欽定四庫全書

子部

石山醫案卷中

詳校官太醫院醫士臣趙正池

編修臣倉聖脈覆勘

總校官庶吉士臣何思鈞

校對官助教臣胡予襄

謄錄舉人臣吳之承

欽定四庫全書

石山醫案卷中

明陳桷撰

吐血

咳血

一人年三十餘形瘦神瘁性急作勞傷於酒色仲冬吐血二盃盈腹脹腸鳴不喜食飲醫作陰虛治不應明年春又作食積治更灸中脘章門復吐血碗許灸瘡不潰全食鮮魚愈覺不爽下午微發寒熱不知饑飽

予診其脉濡細而弱右脉尤覺弱而似弦曰此勞倦
飲食傷脾也宜用參芪白朮歸身甘草甘溫以養脾
生地麥門冬山枝甘寒以涼血陳皮厚朴辛苦以行
滯隨時暄涼加減煎服久久庶或可安三年病愈後
往臨清買賣復縱酒色遂大吐血頓沒

一人年二十餘形瘦色脆病咳血醫用滋陰降火及清
肺之藥延及二年不減又一醫用茯苓補心湯及參
蘇飲皆去人參服之病增邀予診之脉細而數有五

至餘曰不可為也或曰脉訣云四至五至平和之則何謂不可為予曰經云五臟已衰六腑已極九候雖調猶死是也且視形症皆屬死候經曰肉脫熱甚者死嗽而加汗者死嗽而下泄上喘者死嗽而左不得眠肝脹右不得眠肺脹俱為死症今皆犯之雖飲食不過肌膚去死近矣越五日果卒凡患虛勞犯前數症又或嗽而喉痛聲啞不能藥或嗽而肛門發癢皆在不救醫者不可不知

一人年三十時過於勤勞嘔血彼甚憂惶予為診之脉皆緩弱曰無慮也由勞倦傷脾耳遂用參芪歸朮陳皮甘草麥門冬等煎服月餘而愈越十餘年叫號傷氣加以過飽病膈壅悶有痰間或咯紅噎酸飲食難化小便短赤大便或溏有時滑泄不止睡醒口苦夢多或夢遺醫用胃苓湯病甚邀予診視脉或前大後小或駛或緩或細或大或弱或弦並無常度其細緩弱時常多曰五臟皆受氣於脾脾傷食減五臟俱無

所稟矣故脉之不常脾之虛也藥用補脾庶幾允當
遂以參朮為君茯苓為臣陳皮神麴貝母為佐甘草
黃柏為使服之瀉止食進後復傷食前病又作曰再
用湯藥腸胃習熟而反見化於藥矣服之何益令以
參苓白朮散加肉苳蔻棗湯調下累驗又傷於食改
用參朮芍苓陳皮砂仁凡服大便即瀉曰脾虛甚矣
陳皮砂仁尚不能當况他消導藥乎惟宜節食靜以
守之勿藥可也問命脉如何予曰孟子云夭壽不貳

修身以俟之所以立命也夫壽夭固有定命而人不
可委之於命而不修也人生於世如燭在籠火在灰
也罩以籠壅以灰則燭與火可保無虞人能遠色節
食養性存心使汗不妄泄精不妄施數雖有修短而
得以終其修短之數命雖有天速而得以盡其天速
之期苟或反是譬猶燭之徹籠且置之雨側則東流
西缺無復完物修者短短者亦不得以終其命矣譬
如火之失灰且移之風外左吹右擊無復全體壽者

天天者不得盡其數矣故曰君子修之吉小人悖之
凶又曰靜者壽動者夭又曰自作孽不可活又曰禍
福無不自已求之者聖賢叮嚀告戒無非欲人自保
其命不可戕害其命也脉則氣血之徵兆氣血和則
脉和氣血病則脉病但可以知其病耳命則在人
在於脉也故曰命在我

一人年五十形色蒼白性急語不合則叫號氣噦嘔吐
一日左妳下忽一點痛後又過勞惱怒腹中覺有穢

氣衝上即噉極吐或亦乾欬無痰甚則嘔血時發如
瘡或以瘡治或以痰治或以氣治藥皆不效予往診
之脉皆浮細畧弦而駛曰此土虛木旺也性急多怒
肝火時動故左妳下痛者肝氣鬱也穢氣衝者肝火
凌脾而逆上也嘔血者肝被火擾不能藏其血也咳
嗽者金失所養又受火尅而然也嘔吐者脾虛不能
運化食鬱為痰也寒熱者木火交戰也茲宜泄肝木
之實補脾土之虛清肺金之燥庶幾可安遂以青皮

山枝各七分白芍黃芪麥門冬各一錢歸身阿膠各七分甘草五味各五分白朮錢半人參三錢煎服月餘諸症盡釋

一人年逾三十形色清癯病咳嗽吐痰或時帶紅飲食無味易感風寒行步喘促夜夢紛紜又有癩疔醫用芩連二陳或用四物降火或用清肺初服俱效久則不應邀予診之脉皆浮濡無力而緩右手脾部濡弱頗弦曰此脾病也脾屬土為肺之母虛則肺子失養

故發為咳嗽又肺主皮毛失養則皮毛踈豁而風寒
易入又脾為心之子子虛則竊母氣以自養而母亦
虛故夜夢不安脾屬濕濕喜下流故入肝為癰疽且
癰疽不痛而屬濕宜用參朮茯苓補脾為君歸身麥
門冬黃芩清肺養心為臣川芎陳皮山查散鬱去濕
為佐煎服累效後以參四錢芪三錢朮錢半茯苓一
錢桂枝一錢常服而安

賜源謝大尹年四十時房勞病咳血頭眩脚弱口氣夢

遺或時如冷水滴於身者數點詣予診視脉皆濡緩而弱獨左關沉微按之不應曰此氣虛也彼謂房勞咳血夢遺皆血病也左關沉微亦主血病且聞肥人白人病多氣虛今我形色蒼紫何謂氣虛予曰初病傷腎經云腎乃胃之關也關既失守胃亦傷矣故氣壅逆血隨氣逆而咳也又經云二陽之病發心脾男子少精女子不月二陽者腸胃也腸胃之病必延及心脾故夢遺亦有由於胃氣之不固也左手關部細

而分之雖屬肝而主血槩而論之而寸俱主上焦而
察心肺兩關俱主中焦而察脾胃兩尺俱主下焦而
察肝腎是左關亦可以察脾胃之病也古人治病有
憑症有憑脉者有憑形色者今當憑症憑脉而作氣
虛議治焉遂用參芪各三錢白朮白芍歸身麥門冬
各一錢茯神枝子酸棗仁各八分陳皮甘草各五分
煎服朝服六味地黄丸加黃柏椿根皮夜服安神丸
年餘而安越十餘歲致政歸田再為診之右手三部

脉皆隱而不見身又無病此亦事之異也世謂太素脉法片時診候能知人終身禍福豈理也哉

一人形瘦色悴年三十餘因勞咳嗽吐血或自汗痞滿每至早晨嗽甚吐痰如腐渣乳汁者一二碗仍復吐盡所食稍定醫用參蘇飲及枳縮二陳湯彌年弗效衆皆危之邀予診治脉皆濡弱近駛曰此脾虛也宜用參芪或曰久嗽肺有伏火雜著云咳血嘔血肺受火邪二者禁用參芪今病犯之而用禁藥何耶予曰

此指肺嗽言也五藏俱有嗽今此在脾丹溪曰脾具坤靜之德而有乾健之運脾虛不運則氣壅逆肺為之動而嗽也故脾所裏之血胃所藏之食亦隨氣逆而嘔吐焉茲用甘溫以補之則脾復其乾健之運殆必壅者通逆者順肺寧而嗽止胃安而嘔除血和而循經又何病之不去哉遂以參芪為君白朮茯苓麥門冬為臣陳皮神麴歸身為佐甘草黃芩乾姜為使煎服旬餘遂安

一人形色頗實年四十餘病嗽咯血而喘不能伏枕醫
用參蘇飲清肺飲皆不效予診之脉皆浮而近駛曰
此酒熱傷肺也令嚼太平丸六七粒其嗽如失

村庄一婦年五十餘久嗽咯膿血日輕夜重詣診視脉
皆細濡而滑曰此肺痿也曾服何藥出示其方非人
參清肺散乃知母茯苓湯也二藥皆犯人參半夏一
助肺中伏火一燥肺之津潤故病益加為處一方天
麥門冬阿膠貝母為君知母生地紫苑山枝為臣桑

白皮馬兜鈴為佐款冬花歸身甜葶藶桔梗甘草為
使煎服五貼遂安

一人年逾三十形近肥色淡紫冬月感寒咳嗽痰有血
絲頭眩體倦醫作傷寒發散不愈更醫用四物加黃
栢知母益加身熱自汗胸膈痞悶大便滑瀉飲食不
進夜不安寢詣予診治右脉洪緩無力左脉緩小而
弱曰此氣虛也被謂痰中有紅或略黑痰者皆血病
也古人云黑人氣實今我形色近黑何謂氣虛予曰

古人治病有憑色者有憑脉者丹溪云脉緩無力者氣虛也今脉皆緩弱故知為氣虛矣氣宜溫補反用寒涼陽宜升舉反用降下又加以發散則陽氣之存也幾希遂用參芪各四錢茯苓白芍麥門冬各一錢歸身八分黃芩陳皮神麴各七分蒼朮甘草各五分中間雖稍有加減不過兼以行滯散鬱而已煎服百貼而安

一人形色蒼白年三十餘咳嗽咯血聲啞夜熱自汗邀

予診視脉皆細濡近駛曰此得之色欲也遂以四物加麥門冬紫苑阿膠黃栢知母煎服三十餘貼諸症悉減又覺胸腹痞滿惡心畏食或時糞溏診之脉皆緩弱無復駛矣曰今陰虛之病已退再用甘溫養其脾胃則病根去矣遂以四君子湯加神麴陳皮麥門冬服十餘貼病安視前尤健

一人年逾三十形瘦色脫過於房勞病怠惰嗜卧食後腹痛多痰覺自胃中而上又吐酸水肺氣不清聲音

不亮已更數醫或用補陰消導等劑邀予診治脉皆
細濡無力約有七至問曰熱乎曰不覺曰嗽乎夜間
數聲而已曰大便何如近來帶溏糞門傍生一瘡今
已潰膿未收口耳曰最苦者何夜卧不安四肢無力
而已予思脉病不應夫數脉主熱今覺不熱乃內蒸
骨髓歟或正氣已極無復能作熱歟據症似難起矣
何也虛勞糞門生瘡必成癰瘡脉不數者尚不可為
况脉數乎蓋肺為吸門司上大腸為肛門司下肺與

大腸府藏相通况肺為氣主氣陽當升虛則下陷所謂物極則反也今病內熱燔灼肺氣久傷故下陷肛門而生瘡癰肺傷極矣非藥能濟予遂告歸月餘果卒故凡虛勞之病或久泄或左或右一邊不得眠者法皆不治也

消渴

一婦年三十餘常患消渴善饑脚弱冬亦不寒小便白濁浮於上者如油予診脉皆細弱而緩右脉尤弱曰

此脾瘕也宜用甘溫助脾甘寒潤燥方用參芪各錢半麥門冬白朮各一錢白芍天花粉各八分黃柏知母各七分煎服病除後口味不謹前病復作不救

彙萃

一人形長蒼紫素善食喜啖肉年近六十時六月傷饑又被雨濕既而過食冷物腹中疼脹嘔吐次年至期前病復作醫作傷食或作冷氣率用香燥消導之藥時作時止第三年十月病又作食則胃脘勵痛近來

忽吐瘀血如指者三四條大便溏瀉亦皆穢汚又常
屢被盜驚今猶卧則驚寤予診左脉沉弱右脉浮虛
但覺頗弦次早復診左脉濡小無力右脉虛豁令用
人參二錢白朮錢半茯苓神當歸生地黃芪酸棗仁各
一錢石菖蒲五分山枝七分五貼覺力健而食進尚
噯氣失氣未除飲食少味令人參加作三錢白朮加
作二錢服愈

一人年十九形瘦面色黃白三月間微覺身熱五月間

因勞傷於酒肉遂大熱膈悶夢遺盜汗午後熱甚或作食積或作陰虛或作痰火治皆不應予為診之午間脉皆洪滑予曰食飽之餘脉不定也來早再診脉皆收歛而弱右脉尤弱遂以人參三錢黃芪錢半白朮麥門冬各一錢黃柏知母山查各七分枳實甘草各五分煎服一貼熱減汗除五服去泰去甚惟夢遺一月或二次或三次令服固精丸五六兩仍令節食守淡味病當愈也後又覺熱前方減甘草加石膏錢

半牡丹皮八分

一人年三十形瘦淡紫纔覺氣壅腹痛背脹則吐腹中
氣塊翻動嘈雜數日乃吐黑水一盥盆而作酸氣吐
後噯氣飲食不進過一二日方食大便二三日不通
小便一日一次常時難向右卧午後怕食食則反飽
脹痛行立坐卧不安日輕夜重二年後請予診治脉
皆浮弦細弱曰此脾虛也脾失健運故氣鬱而脹痛
吐黑水者蓋因土虛不能制水故膀胱之邪乘虛而

侮其脾土經云以不勝侮其所勝是也酸者木之所
司脾土既虛水挾木勢而凌之焉醫作痰治而用二
陳剛劑則脾血愈虛又作血治而用四物柔劑則是
以滯益滯又作熱治而用黃連解毒則過於苦寒又
作氣治而用丁香沉藿香則過於香燥俱不達中遂以
人參三錢黃芪錢半歸身一錢香附陳皮神麴各七
分黃芩甘草各五分吳茱萸三分煎服旬餘又犯油
膩病作如前而尤重仍以前方加減或湯或散丸服

至半年而愈

一人年逾三十形色瘦黑飲食倍進食後吐酸食飯乾惡難吞常有結痰注于胸中不上不下纔勞則頭暈眼花或時鼻衄糞後去紅或黑午後至晚胸膈煩熱眉心時疼好睡醒來口舌乾苦盜汗夢遺脚冷手及臀尖生膿疱瘡醫以四物湯涼血之劑治之不效詣予診治左脉小弱而數右脉散弱而數俱近六至曰症脉皆屬陰虛作陰虛治之不效何也此必脾虛濕

鬱為熱而然也今用滋陰降火反滋濕而生熱病何
由安宜用參芪甘溫之劑補脾去濕可焉問曰丹溪
論瘦黑者鼻衄者脉數者參芪皆所當禁予曰固也
豈可執為定論而不知變可乎脉經云數脉所主其
邪為熱其症為虛遂以人參二錢黃芪錢半白朮麻
黃根生地茯苓麥門冬各一錢歸身川芎各八分黃
芩七分麥芽厚朴黃柏枳實五味各五分服之而愈
因勞病瘧仍用前方除麻黃根牡蠣麥芽枳實厚朴

黃栢五味加澤瀉柴胡青皮山梔各七分甘草五分服十餘貼胸腹腰臍生小瘡而愈

一人於幼時悞服毒藥瀉痢後復傷食腹痛大泄不止今雖能食不作腹痛每至六七月遇服毒藥之時痛泄復作善飢多食胸膈似冷夜間發熱嗜卧懶語聞淫欲言盜汗陽舉心動驚悸喉中有痰小便不利大便或結或溏過食則嘔吐瀉泄脉皆濡弱而緩右脉略大尤覺弱也次日左脉三五不調或一二至緩三

五至駛右脉如舊緩弱余曰左脉不調者此必欲動
搖其精也右脉尤弱者由於毒藥損其肺也理宜固
腎養脾遂以人參錢半白朮茯苓芍藥黃芪麥門冬
各一錢歸身澤瀉各八分黃柏知母山查各七分煎
服旬餘而安

一人年五十餘形色蒼古五月間泛水與人爭辨冒雨
勞役受飢且有內事夜半忽病發熱惡食上吐下瀉
昏悶煩燥頭痛身痛因自發汗汗遂不止遣書來示

脉皆洪數予曰脉果洪數乃危症矣盖吐瀉内虚汗多表虚兼之脉不為汗衰亦不為瀉減在法不治但古人有言醫而不活者有也未有不醫而活者也令用人參五錢以救裏黃芪五錢以救表白朮三錢乾姜七分甘草五分以和中安胃白茯苓一錢陳皮七分以清神理氣水煎不時溫服一酒盃看其病勢何如服至六七貼則見紅斑而四肢尤甚面赤身及四肢脹悶人來告急予曰斑症自吐泄者多吉謂邪從

上下出也但傷寒發斑胃熱所致今此發斑由胃虛而無根失守之火遊行於外也可補而不可泄可溫而不可涼若用化斑湯玄參升麻之類則死生反掌矣仍令守前方服十餘貼諸病悉減斑則成瘡肢腫亦消而愈

一人形短蒼白平素善飲五月間忽發寒熱醫作瘧治躁渴甚時常啖梨呿吐痰多每次或至碗許飲食少進頭暈昏悶大便不通小便如常或赤夜夢不安

或一日連發二次或二日三日一發或連發二日平素兩關脉亦浮洪邀予適以事阻令服獨參湯二三貼嘔吐少止寒熱漸住三日他醫曰渴甚脉洪熱之極矣復用獨參以助其熱非殺之而何及予往視脉皆浮洪近數予曰此非瘧而亦非熱也脉洪者陰虛陽無所附孤陽將欲飛越故脉見此其病屬虛非屬熱也渴甚者胃虛津少不能上朝於口亦非熱也蓋年逾六十血氣已衰加以瘧藥性皆躁烈又當壯火

食氣之時老人何以堪此然則邪重劑輕非參所能
獨治遂以參芪各七錢歸身麥門冬各一錢陳皮七
分甘草五分水煎每次溫服一酒盃服至六七貼痰
止病除食進大便旬餘不通導之以蜜仍令服三十
餘貼以斷病根續後脉亦收斂而緩非復向之鼓擊
而駛也

一人年逾三十形瘦蒼白病食則胸膈痞悶汗多手肘
汗出尤多四肢倦怠或麻晚食若遲來早必泄初取

其脉浮軟近駛兩關脉乃略大予曰此脾虛不足也
彼曰已服參朮膏胸膈亦覺痞悶恐病不宜於參芪
耶予曰膏則稠粘難以行散故也改用湯劑痞或愈
乎令用參芪各二錢白朮錢半歸身八分枳實甘草
各五分麥門冬一錢煎服一貼上覺胸痞下覺失氣
彼疑參芪使然予曰非也若參芪使然只當胸痞不
當失氣恐由脾胃過虛莫當枳朴之耗耶宜除枳朴
加陳皮六分再服一貼頓覺胸痞寬失氣除精神爽

愷脉皆軟緩不大亦不駛矣可見脾胃虛者枳朴須散用為佐使況有參芪歸朮為之君尚不能治然則醫之用藥可不慎哉

一婦五十七歲五月間因勞夜卧天熱開窓醒來遍身脹痛疑是沙症刮背起紫疙瘡因而胸膈脹痛磨木香服之致小腹作痛咳嗽氣壅不能伏枕吐痰腥臭每次一二椀亦或作泄肛門脹急自汗不止身表浮腫醫作傷寒而用發散或作肺癰而用寒涼延綿一

月醫皆辭去其子來告予予曰第未知得何脉耳告
曰醫謂脉洪數也予曰年逾五十血氣已衰又加以
小勞而當酷熱之時又不免壯火食氣且脉洪數乃
熱傷元氣而然非熱脉也所可慮者脉不為汗衰為
泄減耳彼曰用生脉湯人參二錢門冬二錢五味一
錢病似覺甚予曰邪重劑輕也理宜黃芪五錢以固
表人參五錢以養內白朮三錢茯苓錢半滲濕散腫
陳皮七分吳茱萸四分消痰下氣再加甘草五分以

和之門冬一錢以救肺依法煎服十餘貼後雖稍安
脉與病反終不救

一婦年逾三十形色脆白久病虛弱余為調治十餘載
矣須不能純去泰去甚至嘉靖癸未便道復為診之
左脉似有似無右脉浮濡無力予曰平素左脉不如
此今忽殫深為之懼越三日再診兩手脉皆浮濡左
則不似有似無右則畧近於駛而已乃知脉變不常
昨今異狀者由虛而然也今醫以片時診察即謂其

病若何遂解囊撮藥此亦失之疎略未必能盡其病情也近患頭眩眼昏四肢無力兩膝更弱或時氣上衝胸哽於喉中不得轉動則昏憊口禁不省人事內熱口渴鼻塞飲食減經水漸少予用人參三錢歸身白朮麥門冬各一錢黃芪錢半黃柏七分枳實五分甘草四分煎服缺藥日久前病復作服之又安

一人年逾三十質弱色蒼初覺右耳不時冷氣呵呵如箭出一陣越兩月餘左耳亦如右而氣出早晨聲啞

胸前有塊攢熱飯後聲啞稍開攢熱少息頃間又覺
攢熱或嗽惡酸水小便頻赤大便溏泄睡熟被嗽而
醒噦惡二三聲胸腹作脹頭腦昏痛不堪或時發熱
遍身疼痛天明前病少息惟攢熱不除近來午後背
甚覺寒兩腿麻冷令人參二錢半茯苓門冬白朮
各一錢黃連甘草枳實各五分貝母歸身各一錢白
芍八分煎服而愈

一婦蒼白不肥不瘦年逾五十病舌尖痛三年纔勞喉

中熱痛或額前一掌痛早起頭暈飲食無味胸膈痞悶醫用消導清熱之藥不效予診右脉濡散無力而緩左脉比右頗勝亦近無力十五年前哭子忒甚遂作憂思傷脾哭泣傷氣從東垣勞倦傷脾之例用參芪各錢半白朮芍藥天麻各一錢川芎玄參各七分甘草枳實各五分黃栢陳皮各六分煎服而愈

楊梅瘡

一人色蒼黃瘦年三十餘病遍身惡瘡因服輕粉而脚

拘攣手指節腫額前神庭下腫如雞卵大方士令服孩兒骨其法取初生孩兒置磚地上周以炭火煏使死孩成灰紙裏放地上出火毒為末空心或酒或湯調服二三錢謂能補也邀予診視脉皆濡緩而弱予曰病已三年毒已盡矣但瘡潰膿血過多以致血液衰少筋失所養故腳為之拘攣况手指節間頭上額前皆血少運行難到之處故多滯而成腫理宜潤經益血行滯散腫今服孩兒骨猛火炮炙燥烈殊甚且向

所服輕粉性亦燥烈丹溪曰血難成易虧今外被瘡
膿所涸內被燥劑所燠以難成易虧之血曷能當此
內外之耗乎不惟腫不能消殆必壽亦損也問曰本
草輕粉辛冷何謂燥烈予曰本草註云硃砂伏火者
大毒殺人水銀乃火煨硃砂而成其性滑動走而不
守氣味俱陽從可知矣陽屬熱火故毒比硃砂為甚
入耳蝕腦入肉百節拘攣也然輕粉又水銀和入皂
礬再加火煨而成是為陽中之陽又復資以礬之燥

烈非大毒燥烈而何又問此瘡從何而生予曰肝屬風而急暴腎屬水而主液為相火所寄淫夫淫婦擾動厥陰之火泄其腎水既無以制火之衝逆而反以為相火之助經曰火自水中起是也故腎之液皆被火鬱成痰濁痰瘀血流注莖頭發為姦瘡久而毒熱不解復於兩腿厥陰經分又生惡瘡以其瘡狀類楊梅故俗名為楊梅瘡亦有如豌豆者由其毒有微甚也旬日之間延及遍體者以厥陰屬風而急暴又得

相火以為之助宜其發之暴且速也初生之時體氣壯大便堅飲食進惟防風通聖散為最宜體氣弱大便溏飲食少則用四物加玄參連翹射干為主大便稍泄除射干上體多者黃芩或防風為佐下體多者黃柏或牛膝為佐引以皂角針之鋒銳和以甘草節之甘緩却厚味絕房帷隨症出入服之久久無有不安或有惡湯藥者壯盛之人則以三補丸加大黃生地用猪膽汁丸服怯弱之人則以三補丸加玄參生

地亦用猪膽汁丸服似亦簡便世人欲求速效皆用輕粉濕痰被劫三五日間瘡因暫愈然燥熱尚在不越一旬二旬瘡又復作翻思前藥又劫又愈愈又復發展轉不休殊不知用一次劫藥增一次燥熱由是肢體或癰潰或攣曲遂成痼癢論語欲速不達厥有旨哉又問何以能相染也予曰其人內則素有濕熱外則表虛踈疎或與同廁而為穢氣所蒸或與共床而為瘡汁所漬邪氣乘虛而入故亦染生此瘡經曰

邪之所湊其氣必虛是也亦有同廁同床而不染者
蓋由內無濕熱之積外無表虛腠疎之患是以邪不
能入而瘡不相染矣雖然子之所慎齋戰疾然亦不
可自恃而不加之意也又問已悞於藥悔不可追今
將何藥以解之乎時正仲夏余用十全湯去桂附加
紅花牛膝黃栢薏苡仁木香火麻仁羌活煎服百貼
空心常服東坡四神丹加黃栢又少加蜀椒以其能
來水銀然後脚伸能行指腫亦消惟額腫傳膏而愈

一人患此瘡脚膝攣痛有人取蝦蟇治如食法令食之而攣痛遂愈此亦偶中也 又一人患此瘡脚痛而腫或令採馬鞭草煎湯薰洗湯氣纔到便覺爽快候溫洗之痛腫隨減此草在處有之檻外空地尤多其葉類菊春開細碎紫花秋復再花抽穗如馬鞭故名馬鞭草 又一人患此通身筋骨疼痛遇一道流問曰神色憔悴有病耶曰因瘡遍身痛也道流曰輕粉多矣吾亦被其毒矣遂示一方不過數味藥也

但每貼入鉛五錢打扁同煎服之果驗凡患此瘡年久不愈者用草薺二三兩為君隨症虛實加入他藥罔有不效蓋草薺善驅濕熱故也

一人年三十餘因患此瘡服輕粉致右腹肋下常有瘡塊右眼黑珠時有丁子努出如雀屎許間或又消身有數瘡未痊一醫為治瘡毒而用硝黃一醫為治瘡塊而用攻尅一醫為治眼丁而用寒涼諸症不減反加腹痛腸鳴大便滑泄胸膈壅悶不思飲食噯氣吐

沫身熱倦怠夜卧不安季冬請余往視脉皆浮濡近
駛曰誤於藥也前藥多係毒劑胃中何堪此物耶遂
令棄去更用人參四錢黃芪二錢白朮三錢茯苓炒
芍藥各一錢陳皮神曲升麻各七分甘草肉苳蔻各
五分煎服五貼為泄痛定減去升麻又服五貼膈寬
食進減去苳蔻再服五貼諸症皆除月餘痞塊亦散
眼丁亦消

肺癰

一婦年近三十形色瘦白素時或咳嗽一二聲月水或前或後夏月取涼遂嗽甚不能伏枕者月餘痰中或帶血或無膿嗽緊則吐食醫用苓連二陳不效復用參芪等補藥病重余視左脉浮滑右脉稍弱而滑幼傷手腕掌不能伸右脉似難憑矣乃以左脉驗之恐妊無肺癰也遂以清肺泄肺之劑進之三服而能著枕痰不吐膿不咯惟時或惡阻予曰此妊之常病也教用薏苡仁白朮茯苓麥門冬黃芩阿膠煎服病減

月餘復為診脉皆稍緩而浮曰熱已減矣但吐紅太多未免傷胃教用四君子加陳皮黃芩枳殼煎服調理妊至六月食難病作却難而愈至九月病又復作聲啞令服童便獲安予曰產後病除乃是佳兆病若復來非吾所知月足而產脾胃病作加泄而卒

脚瘡

一婦瘦長面紫每遇春末夏初兩脚生瘡膿泡根紅艱於行步經水不調邀余診視脉皆濡弱近駛兩尺稍

滑曰血熱也醫用燥劑居多故瘡不瘥合用東坡四神丹加黃柏密丸服之瘡不復作

癰腫

邑庠司訓余先生年幾六十長瘦色蒼赴福建考試官回病背腿癰腫一腫愈一腫作小者如蠶大者如鐘繼續不已俗曰流注是也醫皆欲用十宣散五香湯托裏散予為診之脉皆濡弱曰此非前藥所宜也夫以血氣既衰之年冒暑遠步熱瘴之地勞傷形熱傷

氣矣經云邪之所湊其氣必虛理宜滋補使氣運血
行腫不作矣遂用大補湯減桂倍加參芪歸朮佐以
黃柏黃芩紅花服至二三十貼視腫稍軟者用砭決
去其膿未成者果皆消釋仍服二三十貼以防後患
一人肥短紫淡年逾三十因勞感濕兩腿腓間結核痛
甚醫用蒜片灸又針大敦三陰交又以藥水洗之
遂致陰囊腫脹如升莖皮腫如水泡復進人參敗毒
散皆不中病邀余往診脉皆濡緩而弱略駛曰此濕

氣乘虛而入鬱而為熱成結核也理宜溫中行濕可
免後患月餘左腿內廉厥陰經分腫痛如枕惡寒發
熱復用蒜灸六日後腫潰膿出體倦頭面大汗手足
麻木瘡下又腫如枕寒熱大作始信予言用人參三
錢黃芪三錢白朮錢半歸身尾牛膝茯苓各一錢青
皮黃柏各七分甘草節五分煎服五六貼右額羊矢
穴分腫痛長五寸許亦作寒熱醫謂補塞太過欲改
前方彼言汪君已有先見所製之方必不悞我銳意

服之月餘腫皆膿潰成痂而愈惟左脚委中筋急短縮艱於行步彼疑為臂遣書來示余曰膿血去多筋失所養故也藥力足日當不臂矣及果驗後覺陰囊腫繼他醫加茴香吳茱萸治疝等藥不效余適至彼令守前方減去治疝等藥加升麻一錢服一二貼囊即縮矣乃語予曰先生神醫也乃詳告吾病原乎予曰經云營氣不從逆於肉理乃生癰腫又云受如持虛蓋謂氣餒行遲血少留滯則阻逆肉理乃作癰腫

也久則鬱而為熱化肉腐筋而成膿矣腫在厥陰雖
曰多血亦難供給日之所耗夜之所損故邪乘虛留
結不散如持虛器而受物也身之血氣如風與水風
疾水急則頽陂潰隄莫有能禦之者也風息水細則
砂障石壅多有所阻礙矣故今補其氣血使氣壯而
行健血盛而流通又何腫之不散結之不行哉彼曰
理也

疝腫

一兒八歲癰疔陰囊腫脹核有大小予令燒荔枝核灰
茴香炒為末等分食遠溫酒調服二錢不過三服
一兒六歲陰囊脹大如蠶莖皮光腫如泡一醫為之滲
濕行氣不效邀予診視脉皆濡緩曰脉緩無力者氣
虛也經云膀胱者津液之府氣化出焉氣虛不足無
能運化而使之出矣宜升陽補氣可也遂以人參為
君黃芪白朮茯苓為臣牛膝升麻陳皮為佐甘草稍
為使煎服一二貼囊皺腫消三貼全愈

調經

一婦瘦小年二十餘經水紫色或前或後臨行腹痛惡寒喜熱或時感寒腹亦作痛脉皆細濡近滑兩尺重按略洪而滑余曰血熱也或謂惡寒如此何得為熱曰此熱極似寒也遂用黃連酒煮四兩香附歸身尾各二兩五靈脂一兩為末粥丸空腹吞之病退

一婦身瘦面黃舊有白帶產後憂勞經水不止五十餘日間或帶下心前熱上身麻下身冷背心脹口鼻乾

額角冷小便頻而多大便溏而少食則嘔吐素厭肉
味遣書示病如此余曰雖未見脉詳其所示多屬脾
胃不足令服四君子湯加黃芩陳皮神麴歸身二貼
紅止白減復以書示曰藥其神乎繼服十餘貼諸症
悉除

一婦經行瀉三日然後行診其脉皆濡弱曰此脾虛也
脾屬血屬濕經水將動脾血已先流注血海然後下
流為經脾血既虧則虛而不能運行其濕故作參苓

白朮散每服二錢一日米飲調下二三次月餘經行不瀉矣

一婦產後經行不止或紅或白或淡病逾八月面色黃白性躁頭眩脚軟醫用參芪補藥病益加用止瀝藥無效邀余診之右脉濡弱無力左脉畧洪而駛曰右脉弱者非病也左脉偏盛遂覺右脉弱耳宜主左脉治以涼血之劑遂以生地白芍白朮各一錢黃芩阿膠歸身各八分陳皮香附川芎椿根皮茯苓各六分

柴胡甘草各五分煎服二十餘貼而愈

一婦形長質脆面色黃白孀居十餘年平素食少內外俱勞年五十二歲二月忽血崩若左手覺熱崩則又甚醫用苦寒黑灰涼血止血之劑益劇更用膠艾湯少愈偶因子病住藥月餘後服前湯崩則日少夜多七月盡來就余治右脉浮軟頗大左脉軟小而緩獨左尺尤近微弱余謂左脉主血得此與病相應右脉主氣今診得浮軟此乃脾胃氣不足也蓋脾具坤靜

之德而有乾健之運虛則不能健運其血矣胃氣者陽氣也陽主升舉虛則不能升舉其血矣經曰陽病竭而下者此也又曰陽病治陰陰病治陽正其血氣各守其鄉其治此病之謂歟今氣不能健運升舉以致血崩法當治陽世醫昧此但知血熱則行逢冷則凝逢寒則止故用苦寒黑灰之劑殊不知苦以瀉胃寒則降下故經曰苦傷氣寒傷血安能治其崩哉蓋脾胃屬土惡濕喜溫畏寒理宜甘溫養其脾則熱自

除氣自運而血隨氣各歸其經矣東垣曰溫能除大熱經曰形不足者溫之以氣又曰氣生形又曰氣固形實形主血言又曰陽氣者精則養神柔則養筋故古人治血多用養氣豈無所本哉血逢黑則止但可
以治標耳經曰胃者五藏之本苟不固本未免止而復發況其所病或勞或怒或惡食而崩愈甚此蓋由脾胃不足不勝其勞怒也遂用參芪各四錢歸朮各一錢甘草厚朴各五分炒蒲黃阿膠各七分煎服十

餘貼崩則晝止夜來矣夜則陰旺陽衰陽不足以攝
土故也再以棕皮五倍子蓮蓬燒灰加阿膠蒲黃粥
丸臨晚服而夜亦止但清水常流大便燥結小便日
無夜有又用潤麻丸加木通車前空心吞之然腰與
小腹及腳腿皆痛胸膈不寬予適出月餘歸診脉皆
沉細而數余曰數脉所主為熱其症為虛脉與向日
不同而症反覺虛者多因久服前藥失於加減故藏
府習熱而病反見化於藥矣令暫止藥乘轎歸家登

山度嶺加以應接人事勞而又勞越三日血大崩約
一桶許昏憒而氣息奄奄良久稍蘇是夜又崩二三
碗許仍復昏憒余往視之脉仍沉細而數余曰五十
以後血氣大脫實難求生但不忍坐視其斃耳乃用
大劑參芪各七錢歸地姜附各一錢甘草五分煎服
二三貼脉數略減頭痛昏弱腰腳腿痛亦愈日則胸
膈似煩至夜亦愈但小腹時覺微痛清水常流不絕
經曰衝脉者經脉之海主滲谿谷與陽明合於宗筋

會於氣街而陽明為之長皆屬於帶脉故陽明虛則衝脉失養不能滲灌氣化為水而下流矣待其胃氣稍完則清者運而為津液濁者滲而為小便而水或可止也經曰壯者氣行則愈是矣若遇嚴寒又覺小腹腰脚腿痛者亦由陽虛不禦其寒故也天地稍和又不覺矣予曰病須少愈然血氣虛脫來春恐無以資生發之氣耳至春果洞瀉而沒

丹溪曰氣病補血雖不中亦無所害血病補氣則

血愈虛散是謂誅罰無過今病血病而治以參芪
寧不犯丹溪之戒乎予曰學貴疎通不可執泥丹
溪又曰衝任二脉為經脉之海二脉無損則血氣
之行外循經絡內榮五藏若勞動過極損傷二脉
則衝任氣虛不能約制其血故忽大下謂之崩中
治宜舉養脾胃大補氣血丹溪治血何常不歸於
氣虛而養脾胃也東垣亦曰血脫益氣古聖人之
法也先理其胃以助生發之氣諸甘藥為之先務

蓋甘能生血此陽生陰長之理故先助胃氣且人之身納穀為寶予考聖經前賢所治血病未嘗專主於治血而不養氣要在臨病識宜耳雖然此固不免於死所以得遲延而無苦楚者恐亦由於藥力也因筆之幸同志者考其得失

一婦年逾四十形長色脆病經不調右脉浮軟而大左脉虛軟而小近駛嘗時經前作泄今年四月感風咳嗽用湯洗浴汗多因泄一月六月復因洗浴發瘧六

七次瘧雖止而神思不興至八月盡而經水過多白帶時下瀉泄遂覺右脚疼痛舊曾閃肭脚跟今則假此延痛臀腿腰脇尾骨脛項右邊筋皆掣痛或咳嗽一聲則腰眼痛如刀扎日輕夜重叫號不已幸痛稍止飲食如常今詳月水過多白帶時下日輕夜重瀉泄無時亦屬下多亡陰宜作血虛論治然服四物止痛之劑益甚九月予復診視始悟此病乃合仲景所謂陽生則陰長之法矣夫經水多白帶下常瀉泄皆

陽虛陷下而然命曰陽脫是也日輕夜重蓋日陽旺而得健運之職故血亦無凝滯之患而日故輕也夜則陰旺而陽不得其任失其健運之常血亦隨滯故夜重也遂以參朮助陽之藥煎服五七貼痛減此亦病症之變治法殊常故記之

一婦年二十一歲六月經行腹痛如刮難忍求死脉得細軟而駛尺則沉弱而近駛余曰細軟屬濕數則為熱尺沉屬鬱此濕熱鬱滯也以酒煮黃連半斤炒香

附六兩五靈脂半炒半生三兩歸身尾二兩為末粥
丸空心湯下三四錢服至五六料越九年得一子又
越四年經行兩月不斷腹中微痛又服前丸而愈續
後經行六七日經止則流清水腹中微痛又服前丸
而痛亦止又經住只有七八日若至行時或大行五
六日續則遠來遠斷或微紅或淡紅紅後嘗流清水
小腹大痛漸連遍身胸背腰腿骨裡皆痛自己至酉
乃止痛則遍身冷熱汗大出汗止痛減尚能飲食自

始痛至今歷十五年前藥屢服屢效今罔效者何也
余在休寧率口其母伴女荷輜至彼就醫脉皆洪滑
無力幸其尚有精神余曰此非舊日比矣舊乃鬱熱
今則虛寒東垣曰始為熱中終為寒中是也經曰脉
至而從按之不鼓乃陰盛格陽當作寒治且始病時
而形歛小今則形肥大矣醫書曰瘦人血熱肥人氣虛
豈可同一治耶所可慮者汗大泄而脉不為汗衰血
大崩而脉不為血減耳其痛日重夜輕知由陽虛不

能健運故亦凝滯而作痛以症參脉宜用助陽若得脉減痛輕方為佳兆遂投參芪歸朮大劑加桂附一貼來早再診脉皆稍寧隨即回宅服至二三十貼時當二月至五月予適往城視之病且愈矣蓋病有始終寒熱之異藥有前後用舍不同形有少壯肥瘦不等豈可以一方而通治哉後聞乳有隱核數枚彼時失告於余訪之外科歸罪於多服參芪而然殊不知肥人氣虛多滯若能久服前藥不惟乳無隱核縱有

亦當消矣多因病退却藥血氣未充故氣滯血凝而成此核經曰壯者氣行則愈是矣予以書喻祇恐一齊傳衆楚咻莫能回其惑也

一婦每臨經時腰腹脹痛玉戶淫淫蟲出如鼠粘子狀綠色者數十枚後經水隨至其夫問故予曰厥陰風木生蟲婦人血海屬於厥陰此必風木自甚兼脾胃濕熱而然也正如春夏之交木甚濕熱之時而生諸蟲是也宜清厥陰濕熱邪令以酒煮黃連為君白朮

香附為臣研末粥丸空腹吞之月餘經至無蟲而妊
矣

一婦形質瘦小面色近紫產後年餘經水不通首夏忽
病嘔吐手指麻痺攣拳不能伸展聲音啞小噦不出
聲醫皆視為風病危之予診脉皆細微近滑曰此妊
娠惡阻病也衆謂經水不通安有妊娠予謂天下之
事有常有變此乃事之變也脉雖細微似近於滑又
尺按不絕乃妊娠也遂以四君子加二陳治之諸症

俱減尚畏粥湯惟食乾糕香燥之物而有生意

出部脉

一婦年逾四十形色頗實常患產難倒生經水不調或時遍身骨節疼痛食少倦怠自汗予為診之兩手脉皆不應惟右關輕按隱隱然微覺動也疑脉出部以指尋按經渠列缺穴分亦不應余甚怪之乃叩其夫曰有孕時醫診亦言無脉後服八物湯幸爾易產而得一子余曰此由稟賦本來脉不應也無足怪焉可

見天下事變出無窮果難一一以常理測也如脉經所謂但道其常而已兩手無脉不傷其生又不妨於胎妊豈脉經所能論及耶脉或兩手出部或一手出部余見多矣兩手無脉而人如故此亦理之所無事之大變故筆記

一婦有病請余診之右脉緩濡而弱左手無脉再再尋之動於腕臂外廉陽谿偏厯之分乃語之曰左脉離其部位其病難以脉知以右脉言之似屬於脾胃不

足也尚當言其病焉告曰每遇經未行前略血數口
心嘈不安食少懶倦余以四君子湯加山枝陳皮麥
門冬牡丹皮煎服數貼而安

余嘗考孫兆診一釋者左脉出部動於臂上曰此
怪脉也醫書不載脉行常道豈有移易或者少年
驚撲震動心神故脉脫故道耳年既長大血氣已
定不能復移也僧曰果如所言余詢此婦未嘗得
驚而脉如是可見亦由於稟賦也後在歙之江村

診得兩手脉俱出部者數人或左或右一手脉出部者尚多信行診一婦人兩手脉亦出部凡此皆事變無窮理之莫測豈皆由於驚動哉

夫此雖非經水之病

因其脉類前案故錄於此

妊病

一婦懷妊八月嘗病腰痛不能轉側大便燥結醫用人參等補劑痛益加用硝黃通利之藥燥結雖行而痛如故予為診之脉稍洪近駛曰血熱血滯也宜用四

物加木香乳沒黃栢火麻仁煎服四五貼痛稍減燥
結潤復加發熱面赤或時惡寒仍用前方去乳沒黃
栢加柴胡黃芩服二貼而寒熱除又背心覺寒腰痛
復作予曰血已利矣可於前方加人參一錢服之獲
安

一婦嘗患橫生逆產七八胎矣子皆不育予診脉皆細
濡頗弦曰此氣血兩虛兼熱也或曰氣血有餘方成
妊娠氣血既虧安能胎耶予曰觀其形長瘦而脉細

濡屬於氣血兩虛色青脉弦屬於肝火時熾而兩尺浮滑似血虛為輕而氣虛為重也宜以補陰丸除陳皮倍加香附參芪蜜丸服之常令接續踰年臨產果順而育一子

產後

一婦產後滑瀉勺水粒米弗得容即時泄下如此半月餘矣衆皆危之或用五苓散平胃散病益甚邀余診之脉皆濡緩而弱曰此產中勞力以傷其胃也若用

湯藥愈滋胃濕非所宜也令以參苓白朮散除砂仁
加陳皮肉苳蔻煎薑棗湯調服旬餘而安

一婦產後時發昏瞶身熱汗多眩暈口渴或時頭痛惡
心醫用四物涼血之劑病不減復用小柴胡病益甚
予為診之脉皆浮洪搏指予謂產後而得是脉又且
汗多而脉不為汗衰法在不治所幸者氣不喘不作
泄耳其脉如是恐為涼藥所激也試用人參三錢黃
芪二錢甘草當歸各七分白朮門冬各一錢乾姜陳

皮黃芩各五分煎服五貼脉歛而病漸安

小兒驚癇


一女年六歲病左手不能舉動三年矣後復病癇初用人參半夏或效或否予診左脉浮洪右脉頗和曰痰熱也令以帛勒肚取茶子去壳三錢按碎以滾湯一碗瀉取汁隔宿勿食早晨溫服吐痰如大蒜瓣者三碗許手能舉動癇亦不作

余孫應達初生未滿一月乳媪抱之懷間往觀春戲時

風寒甚切及回即啼不乳時發驚搐始用蘇合香繼用驚搐藥不效衆皆危之予曰小兒初生血氣未足風寒易襲此必風邪乘虛而入也風喜傷脾脾主四肢脾受風擾故四肢發搐日夜啼叫不乳經曰風淫末疾是也其治在脾脾土不虛則風邪無容留矣因煎獨參湯初灌二三匙啼聲稍緩再灌三五匙驚搐稍定再灌半酒盃則吮乳漸有生意

泄瀉

一孩孟秋泄瀉晝夜十數度醫用五苓散香薷飲胃苓湯加茵豆蔻罔有效者予曰此兒形色嬌嫩外邪易入且精神怠倦明是胃氣不足而為暑熱所中胃虛挾暑安能分別水穀今專治暑而不補胃則胃愈虛邪亦著而不出經曰壯者氣行則愈怯者著而成病是也令濃煎人參湯飲之初服三四匙精神稍回再服半酒盃瀉泄稍減由是節次服之則乳進而病脫



石山醫案卷中